

(五) 族谱跋

族谱跋（初修士龙公房总跋）

从来族谱之作，重订易、创修难。吾族家谱始宗士龙公五代孙元礼公从兄元福昆仲手抄谱略，留贻以迄本朝，沿袭承讹，不无残缺。生其后者欲继起而更张之，觉重订之难，倍于创修。所可幸者，数百年派系流传，由平而湘而长，按之各房子孙，不差累黍。又觉先人所贻旧本，其嘉赖于后人者匪浅鲜也。

乾隆甲辰春，吾族议建宗祠，落成之后重修家乘。维时谱局石溪同我房晓庵、试陞、统四、梅亭、直斋、玉阶、瑞斋、端亭、舜明、震阶、秀蔚、玉田、松门、文苑、修田暨族众寿山、崇严、赞亭、松坡、杏村诸公，互相参订。今观其考世系、分昭穆、别异同、正名分，并迁徙、卒葬、生死、婚嫁等项，固已原原本本、条晰详明，外且锡以弁言，纪其传赞，诸作之中尤加以宗规、家约、服制、仪节、墓图、凡例、目录、祠记、契券、捐单，其足以信今传后无疑也。

凡属后嗣，奉前哲之典型，敦一本之爱敬，上以体朝廷崇仁广孝之心，下以端化民成俗之本，胥于是乎在也。后有作者，饮水而思其源，当必有绍前宗而光大之者。我等于谱牒告成之候，叙一言以附诸简编，庶得亦邀其末照云。

龙公房后学总跋

族谱后序（二修 士寿公房彬公）

余祖自万寿公始，迄今四百载而还，虽间有文人蔚起，辉煌庠序，而以武功著者较多。如将军、总戎、卫衙、千百户之属者，累世簪缨，功勋卓卓。故沐先朝洪恩，世袭屯操、册注铜版，即世更代易，而名则不磨。此我向氏祖宗竖伟绩于一时，垂福庇于后世耳，使后之人徒食其泽、而不念诸本原之地，夫亦何赖有子孙哉！因是，苦心励志，溯其渊源、明其支派、序其亲疏。虽家素单寒，忙里偷闲，后先四易其稿。而胞兄二迁，慷慨有志，往来各属，几历艰辛，第谱中亲疏，虽云秩叙，未免挂一漏万，此亦因族有人心不一，私欲自为升降，故缺之不书，不使昭穆紊淆，尊卑颠倒，上得罪祖先，下遗憾于后人也。稿成搦管楷书，虽未克付之剞劂，庶费用省而成功易。后有肖子贤孙，重加编辑，或登梨枣，则以兹谱为草创，未必无小补之一助云。

癸未一阳月 东园彬谨书